

Le 20 on nous mande des forts que la plus part des soldats, qu'on croyoit perdus reuiennent tous les iours.

le 24. 3. hurons, qui estoient allez aux trois Riu. porter des cloux pour les basteaux retournent aporta^t. nouvelle qu'un françois de Mon-real est ariué aux trois Riu. disa^t. que 16. sauuages d'oiog⁸en y sont arriuez qu'ils viennent en ambassade. Monseig. de Tracy m'asseure que l'esprit de Monsieur le gouuerneur est tout a fait remis a nostre esgard, et qu'il se resouuiet bien de l'auis, qu'il luy auoit donné des cet esté dans nostre allée, de ne se point broüiller avec les robes noires.

*Mr de Courcelles
reuint a nre Egard.*

Le 30. Monseigneur de Tracy, Mons^r. le Gouuerneur avec le P. Bardy vont en pelerinage a s^{te}. Anne ou le lendemain matin ils font tous leurs deuotions au nombre de 30 personnes ou enuiron. la queste pendant la messe y fut de 68ff. ils furent de retour le mesme iour.

*Pelerinage fameux
a Sainte anne.*

AURIL.

le 12. Le P. Iulien garnier dit sa premiere messe a six heures du matin dimanche de la passion, assisté du R. P. Lalemant.

Ce mesme iour et a cette occasion, nous donnâmes a disner dans nostre sale, comme au iour de St. Ignace, a toutes les puissances, et aux six capitaines qui estoient dans Quebec; nous y assistames le P. Bardy et moy. la compagnie estoit de seize personnes.

P. garnier pretre.